

Ali Hijeeye

id weer ideen weekka edoosa, idtoon Ali Hijeeye ikkessan, ideengoon Zeeneb Hijeeye ikkessan. in Ali Hijeeye wiida ehbel weera menon. walaa weekka kunkenkummunnan. ideen wiida kulli yoomga juu haajag hidma ekkimmii juu haajag hidma ekkimmiy juumkenon. marra weekka shettee weekkuu yaa filfil weekkuug ennijatiron juu suugil jaanja haajakir ekkireya. adda falooson. juu in shetteekko filfilikkokka suugil fershooos aagintaani, moollo neerooson. weekkuu wiida kir urka kekkatira diginga kekkatira aadem ichchi weerakiroossan. neereda kuttakiragooni ay tanga ichchira in eledon. aba ayl Aliille walla Aliille immunne, Aliille walla Aliille immunney iigosagooni, uuuk woo ere'iis iyyon. hooy iigongoon Alii taddoyaa Alii taddoyaa iigon. takkon Alii fejirro filfil weekkuu yaa shetta weekkuug kaagintaan addona iyyon. iii wiida halaas ayle menn ayle menn ayle menne iyyon. addagoon taaron. shetteekko filfilikkokkoon kaagin. Zeeneb Hijeeye kir ir wildiin kabakka ekkirkummii? laa, weekkuu ay neeroossiig ayg urka kekkadeena diginga kekkadeena, aygon kuttakir hayyirdangoosa ayl Aliille walla Aliille immunneya kir ere'iiska taachcha issigsiig Alii fejirro shetteekko filfilikkokka enna kaagintaan addona iyyon tariin baadta ayiin Aliille inekka irbiss. ideengon kutta tukka degirooson, ir miniin jissa iigintaani. meskagoon ideen marra weekka kutta falooson, wildiin kaban daammeenelloo Aliikkon hussan noogil aagin. erkabii ween noogli wiida haajalog jangafiintaan menjingooni, ideengon innog mannog haaja weekka kaara kaagintaan juu guunykangoon erkabii noogiltoon falafin. nogsinga nalagoon juu erkabiin noogiltoon haajatuunyi weekkuug markechchagoon mira taaron. kiragoon wildiig kabarakir aayoottichchon. wallokkilagoon erkabiin falekka bigda juu markechcha kiron. Alii wiida in kabakka ir hiddo elii in kabakka ir hiddo eliy jahaadakachchon. takkon erkabiin noogiltoon ennise iyyon. aygon iddan faa juure iyyon. kiragoon taddan noga feennanga moonoson, la ay witta immunne iyyon in haajag mugoosa faa feeyi, inna ay faa tiigr. erkabiil ikka faa kir kabin. la. tiigooson. kiragoon erkabiil eledon. minaa immii inna aagii? banynyon: Zeeneb Hijeeye tanynyoose iigon narr inaanekka moonoyi, narrog kab. narra dummedongoon la la la la narra dummitame iyyon. Zeeneb Hijeeyel ayga tanynyoose iigon ooyill inaan tanynyinnanga moonoyi ooylog kabe iyyon. ooyil dummongoon, la la la la ooyil dummitame iigon. Zeeneb Hijeeyel ayga tanynyoose iigon ayl inaan moonoyi eddiltoon ayga kabe iyyon. ingir iigoosagoon, hee ayl ikka iigatiyyaa, eyyo iigon. immii ayga kabi aslakira, mina iyyon. banynyon: Zeeneb Hijeeyeguu wildii tanguu manna koomoochcha aaginnan tekka juu kabjimii? issigon: hiddo aagjinnaa? manna aaginnan faa juu erikkirechcha arrateer ayga iron mugookkan. juwagoon

erikkirechcha kiron. inguullina iyyon Zeeneb Hijeeyeguu wildii tanguukkoyi. inguug kabj ayga mugoosa. erkabiil iigatiron Zeeneb Hijeeyega, inna tiigjan, kulli yoomgoon wilid weekka goj okkirden. tayyib iyyon. tiigooshshan. kiragoon erkabiin kutta falookkan erkabiin urtin kudeeltoon gojir weekka marka ekkir gojoosa wilid weekka echchuu biir wee menjin biirra idroosin. wallokkilagoon takken. aag ingeen wildiin halsisiin keelloogoon halaas ayl inga goj okkire iyyon. tayyib iyyon. gojir weekka ekkir goj okkiroosagoon takkon juu biirra torjooron. kir naaydo kiidoo? Aliiddo. erkabiikkon iigatiron, illin faa goj okkiyi. la ayga gojtame iyyon. in erkabiin jeniinan tuul nogafiintaan guunyagoon biirka eleda taachchon: woo erkabii Zeeneb Hijeeyeguu wildii tanguug inna biirr aaginnanaa inna biirr aaginnan! iigatiron: Zeeneb Hijeeyeguu minkelleera menna? tessen goj okkooshsha taaninnee aanya taashshaa? hille iyyon. moollo kirongoon biir wee menjin in biirra kalla idrooson. erkabiikkon biirra wiirka tooragoon diyooson. banynyon: Zeeneb Hijeeye, Zeeneb Hijeeye erkabiig biirra idroosseeni fala kachchan. fala kachchikangoon erkabii biirra toora diyooson. tekkon erkabiin noogil haaja tennig kabintaan issaadangeffaan kabintaan aaginnan.